



KOSOVO SPECIALIST CHAMBERS  
DHOMAT E SPECIALIZUARA TË KOSOVËS  
SPECIJALIZOVANA VEÇA KOSOVA

**Numri:** KSC-BC-2020-04

**Vendosi:** Gjykatësi i procedurës paraprake  
Gjykatës Nikola Giju

**Administratore:** Dr. Fidelma Donlon

**Data:** 12 qershor 2020

**Gjuha:** Anglishte

**Klasifikimi:** Publik

---

**Version i redaktuar publik i  
Fletarrestimit për z. Pjetër Shala**

---

**Prokurorit të Specializuar**

Xhek Smith

**Mbrojtjes së Pjetër Shalës**

**T'i dorëzohet**

Z. Pjetër Shala

**UNË, GJYKATËS NIKOLA GIJU**, gjykatës i procedurës paraprake i Dhomave të Specializuara të Kosovës, i caktuar prej Kryetares së Dhomave të Specializuara në përputhje me nenin 33(1)(a) të Ligjit nr. 05/L-53 për Dhomat e Specializuara dhe Zyrën e Prokurorit të Specializuar (“Ligji”);

**PASI KAM MARRË** parashtrimet konfidenciale dhe *ex parte* të Zyrës së Prokurorit të Specializuar (“ZPS”) me titull “Parashtrim i Aktakuzës për konfirmim dhe kërkesa lidhur me të”, të datës 14 shkurt 2020, dhe “Parashtrim i Aktakuzës së Rishikuar për konfirmim dhe kërkesa lidhur me të”, të datës 18 mars 2020;

**PASI KAM KONFIRMUAR** Aktakuzën e Rishikuar (“Aktakuza e Konfirmuar”) në “Vendim për Konfirmimin e Aktakuzës kundër Pjetër Shalës”, të datës 12 qershor, dhe pasi kam konstatuar aty se ekziston dyshim i bazuar mirë se z. Pjetër Shala (“z. Shala”) ka kryer ose ka marrë pjesë në kryerjen e veprave penale brenda juridiksionit të Dhomave të Specializuara;

**BAZUAR NË** nenet 35(3), 39(3), 41, 53, 54 dhe 55 të Ligjit dhe rregullat 50, 53, 55, 86(6)(b) dhe 208(1) të Rregullores së Procedurës dhe të Provave para Dhomave të Specializuara të Kosovës (“Rregullorja”);

## LËSHOJ FLETARRESTIM PËR

**PJETËR SHALËN**, gjithashtu i njohur si “Ujku”, i lindur më **17 SHTATOR 1963** në **PRIZREN**, Kosovë, aktualisht me shtetësi [REDAKTUAR], **NUMRI I SHTETËSISË** [REDAKTUAR], me adresë të fundit të ditur [REDAKTUAR].

### A. VEPRAT PENALE DHE PARAQITJE E SHKURTËR E FAKTEVE

1. Sikurse parashtrohet në Aktakuzën e Konfirmuar, ekziston dyshim i bazuar mirë se z. Shala mban përgjegjësi penale për krimet e luftës të: ndalimit arbitrar (Pika 1), trajtimit mizor (Pika 2), torturës (Pika 3) dhe vrasjes së paligjshme (Pika 4), në shkelje

të nenit 14(1)(c) të Ligjit. Në lidhje me këto krime, ekziston dyshim i bazuar mirë se z. Shala mban përgjegjësi penale, në bazë të nenit 16(1)(a) të ligjit, për:

- (i) kryerje fizike të krimeve të përfshira në Pikat 1-3;
- (ii) kryerje, si anëtar i një ndërmarrjeje kriminale të përbashkët ("NKP"), të krimeve të përfshira në Pikat 1-4, dhe ndryshe, në lidhje me Pikën 4, si anëtar i NKP-së së lartpërmendur, kryerje të krimit të vrasjes së paligjshme, duke qenë i vetëdijshëm se një krim i tillë mund të kryhet gjatë realizimit të qëllimit të përbashkët të NKP-së dhe duke marrë përsipër këtë rrezik me vullnet të lirë; dhe
- (iii) gjithashtu dhe ndryshe, ndihmë dhe inkurajim në kryerjen e krimeve të përfshira në Pikat 1-4.

2. Sikurse përshkruhet në Aktakuzën e Konfirmuar, këto krime u kryen kundër personave të cilët nuk merrnin pjesë aktivisht në luftime, në fabrikën e metalit në Kukës (Kukës, Shqipëri). Konkretisht, afërsisht midis 17 majit dhe 5 qershorit 1999, së paku [REDAKTUAR] persona pësuan heqje arbitrare të lirisë (Pika 1) dhe disa të ndaluar iu nënshtruan trajtimit mizor dhe torturës (Pikat 2-3). Për më tepër, më 5 qershor 1999 ose rreth kësaj date u vra një (1) i ndaluar në të njëjtën vendndodhje (Pika 4).

3. Krimet e përfshira në Pikat 1-4 u kryen në kontekstin e konfliktit të armatosur dhe në lidhje me këtë konflikt në Kosovë, duke përfshirë përgjatë kufirit të Shqipërisë, midis Ushtrisë Çlirimtare të Kosovës dhe forcave të Republikës Federale të Jugosllavisë ("RFJ") dhe Republikës së Serbisë, ndër të cilat njësite të Ushtrisë Jugosllave, njësite policore dhe njësite të tjera të Ministrisë së Punëve të Brendshme.

#### B. DOMOSDOSHMERIA E ARRESTIMIT

4. Arrestimi i z. Shala është i domosdoshëm në përputhje me nenin 41(6)(b) të Ligjit. Ekzistojnë arsye të artikulueshme për të besuar se: (i) ekziston rreziku i arratisjes,

duke qenë se ai është në dijeni të vendimeve për fajësi penale të bashkëkryesve të pretenduar, të cilat janë raportuar publikisht; është në dijeni të akuzave kundër tij, sikurse paraqiten në Aktakuzën e Konfirmuar, si dhe të dënimeve të mundshme; jeton në një juridiksion ku Dhomat e Specializuara nuk kanë mjet të drejtpërdrejtë për të detyruar paraqitjen e tij në gjyq, dhe ka mundësinë të udhëtojë lirisht në shtetet fqinje; (ii) mund të pengojë procedurën me anë të ndërhyrjes ndaj dëshmitarëve, viktimave, ose bashkëkryesve; dhe (iii) duke marrë parasysh sjelljen dhe veprimet e tij në të kaluarën, mund të kryejë krime të tjera.

### C. ZBATIMI I FLETARRESTIMIT

5. Në qoftë se ekziston informacion se z. Shala ndodhet në territorin e një shteti të tretë, Administratorja ua përcjell fletarrestimin autoriteteve kompetente të atij shteti, me kërkesë që fletarrestimi të dorëzohet dhe zbatohet në praninë e përfaqësuesve të ZPS-së, në përputhje me nenin 55 të Ligjit. Prej shtetit të tretë gjithashtu kërkohet që të informojë menjëherë Administratoren për datën, orën, vendin dhe çdo hollësi tjetër të rëndësishme lidhur me arrestimin dhe transferimin e z. Shala në Dhomat e Specializuara, në përputhje me nenin 55 të Ligjit. Në rast se hasin në vështirësi apo pengesa teknike ose logjistike gjatë zbatimit të këtij fletarrestimi, autoritetet kompetente të shtetit të tretë ftohen që të informojnë përfaqësuesit e ZPS-së dhe/ose të Zyrës Administrative, sipas rastit, për këto vështirësi ose pengesa.

6. Në qoftë se ekziston informacion se z. Shala ndodhet në territorin e Kosovës, ZPS-ja ka autoritetin për zbatimin dhe dorëzimin e këtij fletarrestimi, në përputhje me nenin 35(3) të Ligjit. Rrjedhimisht, ZPS-ja mund të konsiderohet "autoritet kompetent" në bazë të rregullës 49(1) të Rregullores për zbatimin dhe dorëzimin e këtij fletarrestimi. Gjykatësi i procedurës paraprake rikujton se, në bazë të neneve 53(3) dhe 54(1) të Ligjit, Dhomat e Specializuara kanë përparësi kundrejt të gjitha gjykatave të tjera në Kosovë, dhe se ky fletarrestim ka fuqi dhe efekt të njëjtë me fletarrestimet e lëshuara ngancilado gjykatë tjetër e Kosovës. Në përputhje me

nenin 53(1) të Ligjit, të gjithë subjektet dhe personat në Kosovë, ndër të cilët zyrtarë qeveritarë, bashkëpunojnë me ZPS-në dhe Dhomat e Specializuara dhe përmbushin pa vonesë çdo urdhër ose vendim të tyre.

#### D. TRANSFERIMI DHE OBJEKTI I PARABURGIMIT

7. Në përputhje me nenin 3(8)(a) dhe (d), dhe nenin 41(5) dhe (7) të Ligjit, si dhe rregullën 55(4) të Rregullores, pas arrestimit z. Shala transferohet menjëherë në objektin e paraburgimit në Holandë ("shteti pritës"), i mbikëqyrur nga Dhomat e Specializuara dhe i administruar nga Zyra Administrative. Administratorja zbaton urdhrin për transferim dhe bën përgatitjet e nevojshme për transferimin e menjëhershëm të z. Shala.

#### E. TË DREJTAT E Z. SHALA

8. Pas arrestimit, z. Shala gëzon të drejtat e parapara në nenet 21 dhe 41(4) të Ligjit, të cilat duhet t'i lexohen menjëherë pas transferimit në paraburgim të Dhomave të Specializuara ose arrestimit prej ZPS-së, sipas rastit.

9. Z. Shala sillet para gjykatësit të procedurës paraprake pa vonesë, në përputhje me nenin 41(5) të Ligjit.

10. Në bazë të nenit 41(2) dhe (5) të Ligjit, z. Shala ka të drejtë t'i paraqesë gjykatësit të procedurës paraprake ankesë lidhur me ligjshmërinë e arrestimit të tij, të urdhrin për transferim dhe kushtet e paraburgimit, si dhe të paraqesë apel në Dhomën e Specializuar të Gjykatës së Apelit.

#### F. KËRKESA DHE URDHRA TË TJERË

11. Ky fletarrestim, aktualisht i klasifikuar si konfidencial dhe *ex parte*, mund t'u komunikohet, ose ekzistenca e tij mund t'u bëhet e ditur, z. Shala dhe autoriteteve

kompetente të cilitdo shteti të tretë, përfshirë të shtetit pritës, ose Kosovës, nëse është e nevojshme për zbatimin e tij.

12. Duke marrë parasysh klasifikimin e këtij fletarrestimi, gjykatësi i procedurës paraprake kërkon prej autoriteteve kompetente të cilitdo shteti të tretë, ose Kosovës, sipas rastit, të mos ia bëjnë të ditur askujt ekzistencën e këtij fletarrestimi dhe përmbajtjen e tij, përveçse atyre personave përfshirja e të cilëve është absolutisht e domosdoshme për zbatimin e fletarrestimit dhe dorëzimin e tij z. Shala.

\_\_\_\_\_/nënshkrim/\_\_\_\_

**Gjykatës Nikola Giju**

**Gjykatës i procedurës paraprake**

E premtë, 12 qershor 2020

Në Hagë, Holandë.